


www.diarioaruba.com
The way business moves!
DIARIO
Online
 E Matutino di Aruba

Falta di cortesia ta afecta chiquito y grandi

Mirando algun cos cu mi a observa ultimo dianan, mi a sinta pensa cu tin masha poco ta ser haci contra e falta di cortesia den nos sociedad.

Mi a haci anotacion di tur cos cu por a pasa den mi cabez y observa esaki riba caya pa presenta algun di nan awe.

E tema aki por parece un tema sokete, sinembargo nos bida di tur dia ta yen di cosnan chiquito cu ta bira complica debi na falta di cortesia di un homber o un muher, incapaz di bisti zapato di e otro y actua no solamente decentemente, sino tambe bao di patronnan di racionalidad.

Mi por hasta bisa cu actualmente nos comunidad ta sufri di un pandemia cu por ser yama: falta di cortesia.

Falta di cortesia ta afecta grandi y chiquito, homber y muher y ta cosnan cu awendia ta converti tame den un causa di conflictionan innecesario.

E conflictionan aki ta tuma lugar pa motibo di cosnan chiquito cu ta irita hende, y ta indicacionnan di falta di cortesia.

COMPORTACIONNAN

* Dos persona ta conversa bloquendo entrada cu otro no por pasa y mester pidi despena.

Hala un banda pa laga otronan pasa.

* Riba acera ta cana den grupo grandi strobando otro peatonnan. Esaki ta falta di cortesia pasobra e ta stropa fluho normal di trafico di peatonnan. Kibra e grupo y laga espacio pa otronan pasa.

* Subiendo o bahando di trapi, bo ta strobando otronan. Semper hala un banda y mantene bo mes na banda drechi.

* Tene porta habri pa otro pasa. E ta un falta di cortesia di dal porta cera sabiendo cu bo tras tin otro persona cu ta saliendo of drentando tambe. Tuma un pa dos seconde y tene e porta habri pa e otro. Ningun hende ta gusta pa porta dal cera den su cara.

* Den establecimentonan sirbi clientenan cu cortesia na lugar di duna mal servicio o ignora cliente. Mal servicio ta haci hasta e cliente haya mal humor.

* Falta di cortesia ta tambe ora den un establecimiento musica ta zona estilo nightclub. Si bo kier trece cierto ambiente den bo establecimiento, pensa tambe cu no ta tur cliente ta amante di tur clase di musica. Tene consideracion cu nan tambe.

* Nos tin tambe un falta di cortesia pa trahadornan den tur sorto di establecimiento. Tur hende tin derecho di wordo trata cu respet. **"Conta bay, por fabor, y danki"** no a di mas pa expresa na nan.

* Corta y drenta rij. Esaki bo ta haya na varios lugar unda hende mester para den rij pa warda nan beurt. Ta falta di cortesia pa drenta y corta mey mey di e otronan. Bo no ta mas cu esnan den rij sperando nan turno y bo no merece tratamento special.

SIN CORTESIA DEN TRAFICO TAMBE

* Usando palabra malo den publico. Esaki ta un malesa cu tin riba nos isla. Ora haya amigonan o conociman den grupo, y palabra malo ta skeiro, nan ta lubida cu tin otro hende den vecindario cu por ta hendenan religioso, **"ouderswets"** manera sa tende awendia of cu no a lanta cu palabra malo. Nos mester respecta e hendenan. Aki mi mester laga cay riba nos hobennan cu ta tira **"bom tras di bom"** den nan conversacion y na dado momento hasta un **"bom atomico"** ta cay sin importa cu tin otro hende den vecindario, principalmente hende grandi.

* Den trafico ta falta di cortesia ora ta staciona bo auto bloquendo acera, bloquendo salida of entrada di otro vehiculonan, staciona mey mey di caminda.

* Ta falta di cortesia ora bota tras di un auto na un skina y ta cuminsa pita pa loco, sabiendo masha bon cu esun bo dilanti no por move ainda. Bo no por existi di e chofer pa e bira bay un direccion cu no ta e direccion den cual e ta bay.

* Ta falta di cortesia di uso alarma di auto por nada of core cu bo radio y sistema di stereo sacando sonido di discoteca pa tur hende scucha. Esnan cu ti motocicleta cu ta falta muffler ta falta di cortesia produciendo lawaai pa loco.

Ningun hende mester scucha bo vehiculo cu excepcion ora ta trata di un emergencia.

* Usando dos lugar di staciona auto pa bo vehiculo so, tambe ta falta di cortesia. Bo stacionamento di vehiculo no mag di stroba otro di tin e mes derecho y espacio.

* Otro malesa di hopi chofer ta di para mey mey di caminda pa conversa cu otro chofer of cu hendenan canto di caminda, di manera cu ningun vehiculo por pasa.

TIN MAS DI E COSNAN CHIQUITO AKI

* Den bus grandi of chiquito, pone bo saco, tas of pakinan riba bo scochi of bo dilanti. No riba asiento strobando otro pa sinta. Bo tin derecho riba un asiento, solamente un asiento.

* No habri pia den bus grandi ni chiquito pa ocupa mas espacio. Aki tambe ta un asiento bo tin derecho riba dje.

* Un falta di cortesia cu ainda por mira na actividadnan, ta ora cu hendenan di edad halto, muhernan na estado etc. tin cu para, mientras cu bo ta sinta. Lanta y ofrece nan bo asiento si bo ta den condicion pa para (hoben yen di bida). Tin hende cu mester di un asiento. No bira cara haci como si fuera bo ta ciego.

USO DI TELEFON CELULAR

* Uso di telefon celular awendia tambe a trece cune hopi falta di cortesia. Usando bo celular den bus, den lugaman publico ta sin manera tambe.

Esnan rond di bo no kier scucha bo combersacion. Usa e **"ley di diez"**. Bay na minimo diez pia leeuw di esnan den bo vecindario y papia. Si no ta un combersacion di emergencia, bisa esun cu a yamabo cu bo lo yama despues.

* Telefon celular no ta pa bo grita den dje. No ta necesario pa papia na voz halto den publico, usando bo telefon. Cu un volumen conversacional e persona na otro banda ta scuchabo mes bon. Gritando o papiando na voz halto ta molestia otro hende.

* Stropa otro hende papiando na celular. Ata bo den rij y ta combersando. E rij mester move, pero tur hende ta paraliza pasobra mester wardabo termina bo combersacion. Esaki tambe ta sin manera.

ALGUN COS CHIQUITO CU TA GRANDI

* Tiramento di sushi abao y cana bay lague, ta falta di cortesia y respet. Ningun hende kier mira bo susedad. Usa un bari di sushi.

* Keiro cu bo cacho y lague orina riba mata di hende tambe ta falta si respet, no di parti di e cacho. Un hende a tuma su tempo pa planta y cuida e mata. E orina mas bien ta mata e mata.

* Mal manera ta tambe di sinta den un lugar publico, den bus of edificio y pone bo pia riba stoel of banki. Ningun hende ta merece di sinta riba e susedad cu tin bao di bo zapato.

* Scupi riba acera tambe ta algo cu bo ta mira casi diariamente. Ningun hende kier trapa den bo fluido di culpa. E ta vies y ademais insaludable.

Mi lo ta un santo si mi bisa cu mi ta tene mi mes na tur locual mi a skirbi aki riba. No, mi no ta mihor cu otro, nos tur tin nos fayonan, siquiera mester trata di mantene nos mes mas tanto posibel na e norma di cortesia y decencia.

Bo a haci algo descortes, sushi, o di falta di respet pa otronan. Nos sa kico nan ta. Pues, no hacie atrobe!

Oh si... * bo no a flush WC. Esey tambe ta disgusta hende!

Juby Naar.